

雲笈七籤

九

雲笈七籤卷之二十六

登六

宋 張君房輯

明 張 萱訂

十洲三島

十洲 并序 東方朔集

漢武帝既聞王母說八方巨海之中有祖洲瀛洲玄洲炎洲長洲元洲流洲生洲鳳麟洲聚窟洲等十洲並是人跡所希絕處又始知東方朔非世常人是以前延之曲室而親問十洲所在方物之名故書記之方

朔云臣學仙者耳非得道之人以國家盛美特招延
儒墨於文綱之內抑絕俗之道擯虛詭之迹臣故韜
隱逸而赴王庭藏養生而侍朱闕矣亦由尊上好道
且復欲徜徉威儀也曾隨師之主履行比至朱陵扶
桑之闕溽海冥夜之丘純陽之陵始青之下月宮之
間內遊七丘中旋十洲踐赤縣而遨五嶽行陂澤而
息名山臣自少及今周流六天涉歷八極於是矣未
若陵靈之子聽真之官上下九天洞視百方北極鉤
陳而并華蓋南翔太丹而栖火夏東之通陽之霞西

薄寒穴之野日月所不逮星漢所不與其上無復物
其下無復底臣之所識如愧不足以酬廣矣

祖洲

祖洲近在東海之中地方五百里去西岸七萬里上
有不死之草草形如菰苗長三四尺人死者以草覆
之皆當時活也服之令人長生昔秦始皇苑中多枉
死者橫道有鳥如烏狀銜此草覆死人面當起坐而
自活也有司聞奏始皇遣使者齎草以問北郭鬼谷
先生鬼谷先生云臣嘗聞東海祖洲上有不死之草

生瓊田內或名爲養神芝其葉似菰苗叢生一株可活一人始皇於是慨然言曰可採得之不乃使使者徐福發童男童女各三百人率載樓船等入海尋祖洲遂不返福道士也字君房後亦得道

瀛洲

瀛洲在東大海中地方四千里大抵是一會稽郡去西岸七十萬里上生神芝仙草又有玉石高且千丈出泉如酒味名之爲玉一泉飲之數升輒醉令人長生洲上多仙家風俗似吳中山川如中國也

玄洲

玄洲在北海之中戌亥之地地方七千二百里去南岸三十六萬里有太玄都仙伯真公所治多丘山又有風山多風氣響雷電對天西北門上多太玄仙官仙官宮室各異饒金石紫芝又是三天所治之處

炎洲

炎洲在南海中地方二千里去北岸九萬里上有風生獸似豹青色大如狸張網取之積薪數車以燒之薪盡而獸不燃灰中而立毛亦不焦斫刺不入打之

如皮囊卽以鐵鎚鍛其頭數千下乃死而張口向風
須臾復活以石上菖蒲塞其鼻卽死取其腦和菊花
服之盡十斤得壽五百年又有火林山山中有火光
獸大如鼠毛長三四寸或赤或白山可三百里許晦
夜嘗見此山林乃是此獸光照狀如火光相似取其
獸毛以緝爲布時人號爲火浣布也國人衣服之若
有垢汙以灰汁浣之終不潔淨唯以火燒兩食久振
擺之其垢自落潔白如雪亦多仙家居處

長洲

長洲一名青丘在南海辰巳之地地方五千里去岸
二十萬里上饒山川又多大樹樹乃有二千圍者一
洲之上專是林木故一名青丘天有仙草靈藥甘液
玉英又有風山山恒震聲有紫府宮天真仙女遊於
此地

元洲

元洲在北海中地方三千里去南岸十萬里上有五
芝玄澗澗水如蜜漿飲之長生與天地相畢服此五
芝亦得長生不死上多仙家

流洲

流洲在西海中地方三千里去東岸十九萬里上多山川積石名爲昆吾冶其石成鐵作劒光明洞照如水精狀割玉如泥亦多仙家

生洲

生洲在東海丑寅之間接蓬萊七十萬里地方二千五百里去西岸二十三萬里上有仙家數萬天氣安和芝草常生地無寒暑安養萬物亦多山川仙草衆芝一洲之水味如飴酪至良洲者也

鳳麟洲

鳳麟洲在西海之中地方一千五百里洲四面弱水繞之鴻毛不浮不可越也洲上多鳳麟數萬各各爲群又有山川池澤及神藥百種亦多仙家煮鳳喙及鱗角合煎作膠名之爲續弦膠或名連金泥此膠能續弓弩已斷之弦連刀劍斷折之金更以膠連續之處使力士掣之他處乃斷所續之際終無所損也天漢三年帝幸北海祠恒山四月西國王使至獻靈膠四兩及吉光毛裘武帝受以付外庫不知膠裘二物

之妙用也以爲西國雖遠而上貢者不奇稽留使者
未遣久之武帝幸華林園射虎而弩弦斷使者從駕
又上膠一分使口濡以續弩弦帝驚曰異物也乃使
武士數人共對掣引終日不脫如未續時其膠色青
如碧玉吉光毛裘黃色蓋神馬之類也裘入水數日
不濡入火不焦帝於是乃悟厚謝使者而遣去又益
思方朔之遠見周穆王時西胡獻昆吾刀及夜光常
滿盃刀長一尺盃受三升刀切玉如切泥盃是白玉
之精光明照夜冥夕出盃於中庭以向天比明而水

以蒲盃中汁甘而香美斯實靈人之器秦始皇時西
胡獻切玉刀無復常蒲盃耳如此膠之所出從鳳麟
洲來劒之所出從流洲來並是西海中所有也

聚窟洲

滄海島附

聚窟洲在西海中申未地地方三千里北接崑崙二
十六萬里去東岸二十四萬里上多神仙靈官宮第
比門不可勝數及有獅子辟邪鑿齒天鹿長牙銅頭
鐵額之獸洲上有大山形似人鳥之象因名之爲人
鳥山山專多大樹與楓木相類而林芳葉香聞數百

里此爲反魂樹亦能自作聲如群牛吼聞之者皆心
振神駭伐其木根置於玉釜中煮取汁更微火煎如
黑飴狀令可丸之名曰驚精香或名之爲振靈丸或
名之爲返生香或名之爲振檀香或名之爲人鳥精
或名之爲却死香一種六名斯靈物也香氣聞數百
里死者在地聞香氣乃却活不復亡也以香薰死人
更加神驗如此之後延和三年武帝幸安定西胡月
支國王遣使獻香四兩大如雀卵黑如桑椹帝以其
非中國所有以付外庫又獻猛獸一頭形如五六十

曰犬子大似狸而色黃命國使以呈帝帝見使者抱之其以羸細禿悴怪其貢之非也問使者此小物可弄何謂猛獸使者對曰夫威加於百禽者不必計之以大小是以神麟故爲巨象之王鸞鳳必爲大鵬之宗百足之蟲制於螭亦不在於巨細也臣國去此三十萬里國有常占東風入律百旬不休青雲干呂連月不散者當知中國將有好道之君我王固將賤儒墨而貴道德薄金玉而厚靈物也故搜奇蘊貢神香步天林而請猛獸乘毳車而濟弱淵策驥足以度飛

沙契濶途遙辛苦蹊路于今已十三年矣香神起妖
殘之死疾猛獸却百邪之魅鬼夫此二物實是養生
之要助政平化豈圖陛下及不知真乎是臣國占風
之謬矣今日仰鑒天姿亦乃非有道之君也眼多視
則淫色口多言則犯難身多動則淫賊心多飾則奢
侈未有用此四者而成天下之治也武帝忿然不平
又問使者猛獸何方而伏百禽食噉何物膂力何比
其所生何鄉耶使者曰猛獸所出或出崑崙或生玄
圃或生聚窟或生天露其壽不貲食氣飲露解人言

語仁惠忠恕當其仁也愛護蠢動不犯虎豹以下當其威也一聲呌發千人伏息牛馬恐駭驚斷絙繫武士奄忽失其勢力當其神也立興風雲吐嗽雨露百邪迸走蛟龍騰蛇附處于太上之旣役御獅子名曰猛獸蓋神化無常能爲大禽之宗主乃攬天之元王辟邪之長獸者也靈香卽雖少斯更生之神物也疫病災死者將能起之乃聞香氣者卽活也芳又特甚故難歇也於是帝使使者令猛獸發聲試聽之使者乃指獸命發一聲獸舐脣良久忽呌如天大雷聲霹

靈又兩目礮礮交光精氣衝天良久方止帝登時顛
蹶掩耳振動不能自止時衛者武士虎賁俱失伏伏
地諸内外牛馬犬豕之屬皆絕絆離繫驚駭放蕩久
許而定帝忌之因以此獸付上林苑令虎食之於是
虎聞獸來乃相屈聚積如死虎伏獸入苑徑上虎頭
觸虎口去十步已來顧視虎虎輒閉目帝恨使者言
不遜欲收之明日失使者及猛獸所在遣四出尋討
不知所止到後元封元年長安城內病者數千百亡
者大半帝試取月支神香燒之於城內其死未三日